

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
OPĆINSKI SUD U SARAJEVU
Broj: 65 0 St 1032846 23 St
Sarajevo, 26.08.2024. godine

Općinski sud u Sarajevu, stečajni sudija Zlatan Bilić, rješavajući po prijedlogu predlagača – stečajnog dužnika “AESKOM” Društvo sa ograničenom odgovornošću za proizvodnju i promet metalnih i plastičnih proizvoda Sarajevo, ul. Milana Preloga br. 4/VIII, Sarajevo, rješavajući po prijedlogu o povlačenju prijedloga za otvaranje stečajnog postupka od 17.05.2024. godine, odnosno prijedlogu za obustavu stečajnog postupka od 21.08.2024. godine, donio je dana 26.08.2024. godine sljedeće:

R J E Š E N J E

Obustavlja se stečajni postupak nad stečajnim dužnikom „AESKOM“ Društvo sa ograničenom odgovornošću za proizvodnju i promet metalnih i plastičnih proizvoda Sarajevo.

Stavlja se van snage rješenje ovog suda o otvaranju stečajnog postupka broj: 65 0 St 1032846 23 St od 18.03.2024. godine.

Po pravomoćnosti ovog rješenja, Registar pravnih lica ovog suda će izvršiti brisanje zabilježbe otvaranja stečajnog postupka u matičnom registarskom broju subjekta upisa 1-22023.

Troškovi stečajnog postupka padaju na teret stečajnog dužnika.

Ovo Rješenje će se objaviti u "Službenim novinama FBiH", na oglasnoj tabli suda, web stranici suda-elektronskoj tabli suda i na internet stranici FIA-e.

O b r a z l o ž e n j e

Na osnovu prijedloga za otvaranje stečajnog postupka od 04.05.2023. godine ovaj sud je pokrenuo prethodni postupak radi utvrđivanja postojanja uvjeta za otvaranje stečaja, u sklopu kojeg je određen privremeni stečajni upravnik. Dana 20.02.2024. godine privremeni stečajni upravnik je dostavio sudu izvještaj u kojem je naveo kako na dan sastavljanja istog stečajni dužnik nema zaposlenih radnika, nema poslovnih prostorija, da posjeduje neupotreblljive mašine i opremu koja se nalazi u napuštenom proizvodnom objektu, te na osnovu navedenog činjeničnog stanja, ugašenih računa od novembra 2012. godine, kao i nepostojanja adekvatnih stalnih, a ni obrtnih sredstava, nema mogućnosti za nastavak poslovanja društva AESKOM d.o.o. Sarajevo. U prilogu izvještaja dostavljeno je i vještačenje pomenutih mašina, te je vrijednost istih procijenjena na 9.620,00 KM. Shodno navedenom, sud je dana 18.03.2024. godine donio rješenje o otvaranju stečajnog postupka koje je objavljeno, tj. oglaseno u skladu sa Zakonom o stečajnom postupku, te je otvaranje stečajnog postupka upisano u Registar pravnih lica koji se

vodi pred Općinskim sudom u Sarajevu, i to na temelju Rješenja o izmjeni podataka broj: 065-0-Reg-24-001289 od 22.03.2024. godine.

Nakon otvaranja stečajnog postupka, sud je dana 13.05.2024. godine održao ispitno ročište u predmetu broj gornji, kom prilikom je konstatirano da u roku od 30 dana, od objave rješenja o otvaranju stečajnog postupka nije zaprimljena niti jedna prijava potraživanja, pa imajući u vidu da društvo nema poznatih obaveza prema trećim licima, a da raspolaže imovinom u vrijednosti od 9.620,00 KM, to je dana 17.05.2024. godine održano novo ispitno ročište na kojem je utvrđeno kako se ne može osnovano govoriti o insolventnosti stečajnog dužnika, te da nisu ispunjeni uvjeti za zaključenje stečajnog postupka, pa je shodno tome punomoćnik predlagatelja povukao prijedlog za otvaranje stečajnog postupka.

Odredbom člana 5. Zakona o stečaju Federacije Bosne i Hercegovine propisano je da: *"Predstečajni postupak može se otvoriti ako sud utvrdi postojanje prijeteeće platežne nesposobnosti. Prijeteća platežna nesposobnost postoji ako dužnik prema planu dospijeeća novčanih obaveza neće biti u stanju da izmiri preuzete obaveze plaćanja po dospijeeću u narednih 12 mjeseci i ako dužnik kasni sa izmirenjem preuzetih novčanih obaveza do 60 dana."*

Odredbom člana 6. istog Zakona, propisano je da: *„Stečajni postupak može se otvoriti ako sud utvrdi postojanje stečajnog razloga. Razlozi za otvaranja stečajnog postupka su: a) platežna nesposobnost stečajnog dužnika, b) prijeteeća platežna nesposobnost, c) nepostupanje po usvojenom planu reorganizacije i d) ako je plan reorganizacije izdejtvovan prevarom ili na nezakonit način. Stečajni dužnik je platežno nesposoban ukoliko nije u stanju da izvršava svoje dospjele i potraživane obaveze plaćanja. Okolnost da je stečajni dužnik podmirio ili da može podmiriti u cijelosti ili djelimično potraživanja nekih povjerilaca samo po sebi ne znači da je platežno sposoban. Stečajni dužnik je platežno nesposoban, ako: a) 60 dana neprekidno ne izmiruje svoje dospjele novčane obaveze ili b) je račun stečajnog dužnika blokiran 60 dana neprekidno.“*

Odredbom člana 201. Zakona o stečaju FBiH, propisano je da: *„Stečajni postupak se obustavlja na prijedlog stečajnog dužnika ako se pruži osiguranje da nakon obustave stečajnog postupka na strani stečajnog dužnika neće nastupiti platežna nesposobnost i prijeteeća platežna nesposobnost. Sud će prihvatiti prijedlog stečajnog dužnika iz stava (1) ovog člana ako su prestali razlozi za otvaranje stečajnog postupka iz člana 6. ovog zakona.“*

Konačno, odredbom člana 59. stav 1. Zakona o stečaju FBiH, propisano je da: *„Prijedlog za pokretanje stečajnog postupka predlagač može povući do objavljivanja oglasa o otvaranju stečajnog postupka na oglasnoj tabli suda, web stranici suda -elektronskoj tabli suda, u "Službenim novinama Federacije BiH" i na internet stranici FIA-a, odnosno prije donošenja rješenja o odbacivanju ili odbijanju prijedloga za pokretanje stečajnog postupka, o čemu sud donosi rješenje.“*

Primjenom citiranih odredbi proizilazi da predlagač nije mogao da povuče prijedlog za pokretanje stečajnog postupka, obzirom da je rješenje o otvaranju stečajnog postupka objavljeno na oglasnoj tabli suda, web stranici i dostavljeno Službenim novinama Federacije BiH i Finansijsko informatičkoj agenciji. Umjesto toga, prijedlog za povlačenje prijedloga za otvaranje stečajnog postupka se ima cijeliti kao prijedlog za obustavom stečajnog postupka, a ročišta

održana pred ovim sudom dana 13.05.2024. i 17.05.2024. godine kao saslušanje podnosioca prijedloga i stečajnog upravnika u smislu člana 203. stav 4. Zakona o stečaju FBiH.

S tim u vezi, sud je dopisom od 06.08.2024. godine obavijestio stečajnog upravnika, kao zakonskog zastupnika društva nad kojim se provodi stečajni postupak, da je podnesen prijedlog za povlačenje prijedloga za otvaranje stečajnog postupka, te da istom nije moguće udovoljiti u ovoj fazi postupka, te je isti pozvan da se izjasni da li postoje uvjeti za obustavom postupka u smislu člana 201. stav 2. Zakona o stečaju FBiH. S tim u vezi, podneskom od 21.08.2024. godine stečajni upravnik je obavijestio sud da sa svoje strane podnosi prijedlog za obustavom stečajnog postupka, navodeći da društvo nad kojim se provodi stečaj nema evidentiranih obaveza, nema povjerilaca niti pristiglih prijavi potraživanja, ni tri mjeseca nakon održanog prvog ispitnog ročišta, a da prema bilansu stanja društvo ima potraživanja (istina sa minimalnim izgledima za naplatu), te da posjeduje postrojenja i opremu, a da nema blokiranih ni aktivnih računa, iz čega proizilazi da društvo posjeduje imovinu, a nema obaveza pa da stoga ne postoji opravdani interes za nastavak stečajnog postupka, obzirom na odsustvo povjerilaca i obaveza društva.

Shodno navedenom, nakon provođenja ispitnog ročišta ustanovljeno je da uopće nisu postojali razlozi za otvaranje stečajnog postupka iz razloga što stečajni dužnik nije platežno nesposoban, a obzirom na postojanje imovine iz koje bi se potencijalni povjerioci mogli namiriti, te da društvu ne prijete platežna nesposobnost iz razloga nepostojanja bilo kakvih povjerilaca, već štoviše, društvo se javlja kao stečajni povjerilac u predmetu broj; 65 0 St 020833 06 S, u kojem je istom priznato potraživanje u iznosu od 37.905,20 KM. Obzirom da društvo u momentu otvaranja stečajnog postupka nije zapošljavalo radnike, niti imalo stalnih poslovnih prostorija, niti poznatih povjerilaca, to se nije pristupilo reorganizaciji stečajnog dužnika. Konačno društvo nema neplaćenih dospjelih novčanih obaveza, niti blokiranih bankovnih računa, pa je jasno da ne postoje razlozi za otvaranje stečajnog postupka. Istovremeno, imajući u vidu da se za vrijeme vođenja stečajnog postupka nije prijavio niti jedan stečajni povjerilac, to Sud smatra da nema potrebe za pribavljanjem saglasnosti u smislu člana 202. stav 1. Zakona o stečaju FBiH. Obzirom da na osnovu činjeničnog stanja utvrđenog od strane stečajnog upravnika proizilazi da društvo nije platežno nesposobno, niti da predstoji platežna nesposobnost, te obzirom da je u toku postupka utvrđeno postojanje imovine, to sud smatra da se eventualno gašenje ovog privrednog društva mora provesti u okviru likvidacionog, a ne stečajnog postupka, te stoga donosi odluku kao u izreci ovog rješenja

Obzirom da je izvršen upis zabilježbe rješenja o otvaranju stečajnog postupka, a da je isti obustavljen odlukom suda, to je sud odlučio naložiti Registru pravnih lica da izvrši brisanje ove zabilježbe.

Stečajni sudija
Zlatan Bilić

Pouka o pravnom lijeku: Protiv ovog rješenja dopuštena je žalba u roku od osam dana, računajući od petog dana nakon što predmetno rješenje bude objavljeno u Službenim novinama Federacije BiH.